

Na osnovu člana 112. stav 3. Zakona o zdravstvenoj zaštiti ("Službene novine Federacije BiH", broj 29/97), a na prijedlog fakulteta zdravstvenog usmjerenja Federacije Bosne i Hercegovine, federalni ministar zdravstva, donosi

PRAVILNIK

O IZMJENAMA I DOPUNAMA PRAVILNIKA O SPECIJALIZACIJI PORODIČNE MEDICINE

Član 1.

U Pravilniku o specijalizaciji porodične medicine ("Službene novine Federacije BiH", br. 7/99 i 50/00) (u daljem tekstu: Pravilnik), u članu 2. iza tačke 1. "Plan specijalizacije" dodaje se nova tačka 1a., koja glasi:

"1a. CENTAR PORODIČNE MEDICINE

Praktična i teoretska edukacija za specijalizaciju u porodičnoj medicini odvija se u centrima porodične medicine (u daljem tekstu: centar) funkcionalno vezanim za katedre porodične medicine medicinskih fakulteta-sveučilišta u Federaciji Bosne i Hercegovine.

Centar iz stava 1. ove tačke, pored praktične i teoretske edukacije za specijalizaciju u porodičnoj medicini, obavlja dodatnu obuku iz porodične medicine, a za potrebe doktora medicine koji nisu specijalisti porodične medicine, kao i medicinskih sestara-tehničara koji obavljaju poslove svog stručnog naziva u zdravstvenim ustanovama primarne zdravstvene zaštite.

Izuzetno, u slučaju medicinske i ekonomske opravdanosti, a na prijedlog katedri porodične medicine-medicinskih fakulteta u Federaciji Bosne i Hercegovine, Federalno ministarstvo zdravstva može osnovati i satelite centara u lokalnoj zajednici, pri domovima zdravlja.

Centar, odnosno njegov satelit iz st. 1. i 3. ove tačke mogu obavljati dodjeljene funkcije samo ukoliko obezbijede rad najmanje dva doktora medicine u zvanju specijaliste porodične medicine i jedne medicinske sestre-tehničara koja je obavila dodatnu obuku iz porodične medicine.

Za direktora centra, odnosno njegovog satelita, imenuje se lice sa završenim medicinskim fakultetom, u zvanju specijaliste porodične medicine. Direktor centra, odnosno njegov satelit, mora biti član katedre porodične medicine medicinskog fakulteta, a za koji je funkcionalno vezan.

Direktora iz stava 5. ove tačke imenuje i razrješava, na prijedlog katedre porodične medicine medicinskog fakulteta, direktor doma zdravlja, a uz prethodnu saglasnost federalnog ministra zdravstva.

Direktor iz stava 5. ove tačke imenuje se na period od dvije godine, s mogućnošću reizbora za još jedan mandat.

Direktor iz stava 5. ove tačke može biti razriješen dužnosti i prije isteka mandata na koji je imenovan, na način i pod uvjetima kako je to regulirano i za direktora u skladu sa Zakonom o ustanovama ("Službene novine Federacije BiH", br. 6/92, 8/93 i 13/94).

Član 2.

U članu 2. u tački 2.1. "Porodična medicina", st. 1., 2., 3., 4., 5. i 6., mijenjaju se i glase:

"2.1. Porodična medicina

Praktična i teorijska edukacija za specijalizacije porodične medicine odvija se u okviru nadziranog perioda obuke u trogodišnjem programu u trajanju od 18 mjeseci, a u dvogodišnjem programu u trajanju od 12 mjeseci. U nadziranom periodu, specijalizanti porodične medicine upoznat će se sa minimumom evropskih standarda iz porodične medicine.

Teorijski program edukacije organizira se tokom cijelog trajanja specijalizantskog staža u dužini od 36 mjeseci.

Osnove teorijskog programa edukacije prezentirat će se tokom prve dvije godine plana specijalizacije sa ciljem da se svim specijalizantima porodične medicine obezbijedi konzistentan i standardiziran teorijski program.

Didaktički program edukacije se ne organizira po specijalnostima ili kategorijama bolesti. Edukatori iz različitih medicinskih disciplina, uključeni u program edukacije za specijalizaciju u porodičnoj medicini, učestvovat će i u teoretskom programu edukacije.

Ovladavanje osnovama medicinske rehabilitacije obavljat će se u centrima za fizikalnu i mentalnu rehabilitaciju, u trajanju od 2 sedmice.

Praktična i teorijska edukacija za komponentu porodične medicine iz specijalističkog programa obavljat će se u centrima iz tačke 1a. ovog pravilnika."

Član 3.

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-37-2811
27. maja 2002. godine
Sarajevo

Ministar
prim. dr. **Željko Mišanović**, s. r.